

$\pi$  n  
3988



*S.*



h. 75, 25.


II n  
3988

**Vom Christlichen Abs-**  
scheid des Edlen vnd Wolgebornen /  
Graffen Christian / Graffen zu Olden-  
burgk vnd Delmenhorst / etc.

Kurzer bericht vnd trost / sampt einer  
Predigt / gestellet vnd gethan

Durch

**M. PHILIPPVM WAGNER,**  
Churfürstlichen Sächsischen  
Hoffeprediger / etc.



Dresden.

Gedruckt durch Gimmel Bergen.

Anno 1570.

Faint, illegible text, possibly bleed-through from the reverse side of the page. The text is arranged in several lines and appears to be in a historical or legal context.



**Der Durchlauchtigen**  
Hochgebornen Fürstin vnd Frauen  
Frauen Sophyen / Geborne Herzogin zu  
Sachsen / Engern vnd Westphalen / ꝛ. Gressin / vnd  
Frau zu Oldenburgk vnd Delmenhorst ꝛ.  
Meiner gnedigen Frauen.

**D**urchleuchtige / Hochgeborne Fürstin /  
Gnedige Frau / E. G. sind neben meinem  
armen Gebete zu Gotte / meine vnder-  
derthenige dienste / vnd wünschung  
Göttlicher gnaden / auch trosts des heiligen Gei-  
stes beuor. Gnedige Frau / Es ist natürlich  
das fromme Eltern sich ober dem vnglück / vñ son-  
derlich ober dem Abscheid ihrer gehorsamen vnd  
geliebten Kinder zum höchsten bekümmern / für-  
nemlich / wenn die Eltern nu alt / vnd die Kinder  
so weit erzogen seindt / das man ehre vnd freude an  
ihnen auch in diesem leben hoffete zu erfahren / Wie  
dan solche traurigkeit am heiligen Patriarchen Ja-  
cob zu sehen / do ihme die botschafft bracht wirdt /  
oder er nicht anders schliessen kan / dann als hette  
ein wildes Thier ihme seinen lieben Sohn Joseph  
vmbbracht vñ verzeret / do stiftet er grossen jamer /  
A ij Welchs

Welchs der heilige Geist durch Mosen hat auff-  
schreiben lassen/ das wir sehen/ wie auch die heilige  
Patriarchen nicht steinerne hertzen gehabt / Son-  
dern tödliche abförderung ihrer kinder hertzlich be-  
weinet haben/ Dañ es nicht wider Gotte ist/ seiner  
kinder vnglück zubeweinen/ weil er selbs solche na-  
türliche bewegung in die hertzen der Eltern gepflan-  
zet hat. Es mehrete aber dem lieben Patriarchen  
Jacob seinen schmerzen desto mehr/ das *immane ge-  
nus mortis*, der schreckliche todt/ den sein Sohn solte  
genommen haben/ das er durch ein vnuernunfti-  
ges Thier solte so jemmerlich zerfleischt vnd zurißten  
sein. Wie auch der heilige David ober dem schreck-  
lichen tode des Absolons sich so vbel gehabt / vnd  
viel hefftiger dorüber trauret/ dann do ihme Gott  
sein ander Sönlein/ durch vorgehende franckheit/  
natürlicher weise sterben leß/ dañ do kan er der  
traurigkeit also steuren/ das sich auch seine Diener  
darüber verwundern/ Ja er kan sich auch des sein  
trösten/ das er dis sein liebes Sönlein nicht verlo-  
ren/ Sondern nur vorhin geschickt habe / Vnd ob  
es zu ihme nicht wider kōmen werde in dieser Welt/  
so hoffe er doch / Er wölle es in einer andern Welt/  
vnd in einem bessern leben / mit freuden wider  
sehen.

Das

Das also Gott in seinem lieben Worte / Eltern natürlichs weinen vnd bekümmernis nicht wehret / vnd doch doneben auch ihnen anzeiget / das wo ihre Kinderlein in wahrer anruffung des Sohns Gottes / seliglich einschlaffen / das sie sich nicht allein dorüber zu frieden geben / sondern ihres Christlichen Abscheids auch von hertzen trösten sollen / in betrachtung das Gott seine sondere vrsachen dazu hat / Warumb er diesen in der jugent / den andern im alter / von dieser Welt abfordern solle.

Vnd das so solche vnserer traurigkeit vnd bekümmernis desto leichter gestillet werde / so lest vns Gott berichten / warumb er mit jungen Leuten aus der Welt bey zeiten eilet / Vnd ob wir wol one alle vormeldung der vrsachen vns Gottes willen in dem vnd andern solten gefallen lassen / vnd mit dem lieben Job sagen / Der Herr gibt / der Herr nimpt / der Name des Herrn sey gebenedeiet / etc. So wird doch vnserer schwachheit dodurch desto mehr gerahen / wenn wir auch vrsachen solchs gnedigen willens Gottes / aus seinem worte vornemen können.

Nu setzt aber die heilige Schrift diese vrsache erstlich im buche der Weisheit am 4. Capittel / das Gott junge Leut aus dieser Welt hinweg neme / das die bosheit ihren verstand nicht verkere. Dan die

Welt ist so voll böser Exempel / das es fort mehr  
schier schwer sein wil fromme kinder auff zu erziehe/  
oder auch dieselben from zubehalten. Darumb  
wil Gott dem Teuffel vnd der argen Welt / solche  
jugent / aus dem rachen reißen / vnd offtmals auch  
grosser Herren kinder / aus dem Weltlichen reiche /  
in sein Himmereich versetzen / ehe dann sie verführet  
oder betrogen mügen werden / vnd Eltern herkleidt  
an ihnen erleben.

Dann wie offte haben auch wol heilige Leute  
an ihren kindern schande erfahren / das sie freilich  
wol gewünscht hetten / sie weren in der jugent ge-  
storben / das die bößheit ihren verstandt nicht also  
verkeret hette / vnd ihre Eltern nicht also betrübet  
hetten dürffen werden. Also gieng es vnsern er-  
sten Eltern / mit ihrem ersten Sohn dem Cain / der  
lest jo seinen verstandt im wol verderben / vnd füget  
seinen Eltern gros herkleidt zu / das die liebe Eva  
wol offte mag gesagt haben / Ich gedachte / ich hette  
einen Gott geboren / so ist er leider gar zum teuffel  
worden. Also gieng es dem Noe / dem Jacob /  
dem Eli / dem David / die allzumal an ihren Kin-  
dern solch herkleidt erlebten / das sie ohne zweiffel  
offt werden gewünscht haben / Ach das du in der  
swigen gestorben werest / Wie wir offte fromme El-  
tern

tern ihren vngeratenen kindern hören wünschen /  
Ach das ich dich im ersten bade hette ersauffen las-  
sen/ etc. Wir bitten auch zwar offte selber drum  
vnd sagen: Lieber Gott/ do dieser mein Sohn solte  
obel gerathen/ vnd durch böse Leute verführet wer-  
den/ so woltestu ihn nur bey zeiten hinweg nemen /  
Aber wenn es darnach dozu kompt/ so wissen wir  
nicht wie wir vns vñgeberdig oder vngeduldig  
gnug stellen sollen. Darnach geschicht vns auch  
recht / wenn vns Gott die vngeratenen kinder lest/  
dauon wir gekrencket / betrübt vnd zu letzt wol ge-  
tödtet werden/ Wie jener grosser Keyser seine Söh-  
ne/ seine *Carcinomata* nennete / dauon er ohne vn-  
terlas gequelet würde.

Diese erste vrsache so vns Gottes wort mel-  
det / solte allein betrübten Eltern grosse linderung  
schaffen/ das sie sein gedechten / Wolan Gott hat  
mir dis mein liebes kindt dorumb so bald wider ge-  
nommen/ das es nicht durch die Gottlose Welt ver-  
führet werde/ darumb lasse ich mir seinen willen  
auch hirinne gefallen. Derhalben verbent auch  
Christus so ernstlich das man die kinder nicht er-  
gern sol / vnd setzt so eine grosse straffe darauff /  
Matth. 18. Vnd wil haben das wir den kindern sol-  
len gleich werden/ nicht an alter oder verstande /  
Sondern

Sondert an bosheit / die an ihnen geringe ist /  
wollen wir anders ins Himmelreich kommen.

Über diese Ursache stehet in vorigem angezo-  
genen Spruche / noch eine / Nämlich / Gott thue es  
dorum auch / das ihre Seele durch falsche Lehre  
nicht betrogen werde / dann ihre Seele gefelt Gotte  
wol / etc. Wenn unsere Kinder durch die Tauffe dem  
Herren Christo eingeleibet / vnd von neuen gebo-  
ren seindt / do gefelt ihre Seele Gotte wol / Vnd  
wenn als denn Gott mit ihnen aus dem leben eilet /  
wenn sie zu ihrem verstande kommen / vnd in rech-  
ter Lehre vnterweiset seindt / so ist dis mehr dan-  
ckens dann bekümmernis werdt. Dann dodurch  
werden sie für falscher Lehre bewahret / damit sie  
hätten mügen vergiffet werden / wenn sie lenger  
hätten sollen leben. Vnd ob sich einer schon  
für ergernis vnd sünden zum fleissigsten hütet /  
Wer weis ob er sich auch für falscher Lehre hüten  
würde. Sonderlich ist es zu diesen letzten zeiten /  
vmb falsche Lehre sehr gefehrlich / vnter so man-  
cherley Kotten vnd Secten / das wir izund offte  
fromme Eltern hören sagen: Ach wer weis doch  
was meine Kinder noch für eine Religion werden er-  
leben vnd haben? So hören wir auch / was es  
frommen Eltern für ein grosses herzkleidt ist / wenn  
ihre

ihre kinder etwan von der rechten Religion abgefallen/ vnd zu Nammelucken worden seindt/ Sollen die nicht viel lieber wollen/ das ihre kinder in der jugent gestorben weren? Wie viel were es des Arrii/ des Staphili vnd anderer abtrünnigen Lehrer Eltern besser gewesen/ das diese ihre kinder in der Wigen gestorben weren/ denn das sie hernach solche Gotteslesterunge ausgesprenget/ vnd so viel armer Seelen mit falscher Lehre vergiftet habene

Vnd doher gehöret das schöne Exempel der Gottfürchtigen Machabeerin/ welche lieber ihre sieben Söhne für ihren augen eines schmelichen todes wolte sehen sterben/ dann das sie durch Abgötterey verführet würden/ 2. Mach. 7. Solcher sorgen nu werden Christliche Eltern vberhoben / wenn Gott ihre kinder in der besten blüte / seliglich abfordert / Sollen derwegen ihre bekümmernis damit lindern vnd sagen/ Wolan das mir Gott dis mein liebes kindt hinweg nimpt / das thut er freylich darumb / das ich mich nicht dörffte besorgen/ das es durch Kezerey oder falsche Lehre vergiftet werde/ das dancke ich ihme/ das ich nu an meines kindes seligkeit nichts mehr darff zweivehlen.

3      Zu

Zu diesen zweien tröstlichen Ursachen / fonde-  
ten wir andere mehr aus Gottes Worte finden / vñ  
in solchem Falle vns damit trösten / als das Esa. 56.  
steht / Das Gott mit den frommen aus diesem le-  
ben eilet / ehe dann er das gemeine vnglück vñ  
landtstraffen kommen lest / Wie er den lieben Noe  
für der Sündfluth beseits schaffete in die Arche /  
den lieben Loth führete er aus Sodom / ehe dann  
er dieselbe kegend vertilgete. Vñ weil der HERR  
Christus sonderlich diesen vnsern letzten zeiten /  
manchfeltig trübsal verkündiget hat / dauon den  
Leuten wirdt bange werden / so kan einem auch ni-  
mermehr bessers widerfahren / dann wenn Gott  
auffs allererste mit ihme aus diesem leben eilet.  
Do die Völcker Thracen solches bedachten / so weis-  
neten sie / wenn ein Mensch geboren wardt / dage-  
gen aber waren sie guter dinge / wenn eins starbe.  
Vñ darumb hat auch Gott seinen liebsten Freun-  
den allezeit verheischen / Er wolle sie inn friede von  
dieser Welt fordern / ehe dann er das vnglück schick-  
te / welchs er beschlossen hatte / als dem lieben A-  
braham / Gene. 15. Dem frommen Könige Josie /  
2. Para. 34. Vñ wol deme der seliglich abgefors-  
dert wirdt / deme kan weder Tücke / noch Pestilenz /  
vñ ander vnglück nicht schaden. Dann es heist /  
Selig

Selig sindt / die im Herrn entschlaffen / Vnd der  
gerechten Seelen sind in Gottes handt / vnd keine  
qual kan sie nicht rüren / etc.

Wer nu seiner kinder tödlichen / vnd doch seligen  
abscheidt mit vngedult oder vnmiessiger trau-  
rigkeit auffnimpt / der gibt gnug zuuerstehen / das  
er seinen kindern die ruhe nit gännet / dazu sie Gott  
fordert / vnd das er sie lieber hie in aller angst / not  
vnd gefahr / dann dorte in friede vnd freude wolte  
wissen / Welches zwar auch wider die liebe des  
Nehesten / geschweige dann seines eignen fleisches  
vnd blutes / ist.

Letzlich können betrübte Eltern solchen trau-  
rigen sahl desto leichter verschmerzen / wenn sie be-  
trachten das sie jr fleisch vnd blut / als einen Juris-  
rer vorhin geschickt / vnd das Reich Gottes gemeh-  
ret haben / welchem sie auch balde folgen wollen /  
Des sich dann der liebe David tröstet / wie oben  
gemeldet / vnd freuet sich / das er weis / das er sein  
Söhnlein zu Gotte abgefertiget hat / Wie wir offte  
sagen / von seligen verstorbenen Personen / Er ist  
do ihm gar wol ist / Er neme nicht die ganze Welt /  
vnd keme wider hieher. Vnd so viel hab ich in ge-  
mein allen betrübten Eltern zu trost schreiben wollt.

B ij Demnach

Demnach es aber / Gnedige Frau / der All-  
mechtige Gott also geschicket / das E. G. solch be-  
kümmernis / wegen des vnzeitigen tödlichen / vnd  
doch gar seligen abscheids ihres geliebten Herrn  
Sohns Graffen Christians haben erfahren solle /  
werden zwar one des E. G. als ein Christliche vnd  
Hoherleuchtete Gressin / solchen betrübten fahl  
vnd zustandt in gedult wissen zu ertragen / vnd aus  
vorigen erzelten gemeinen vrsachen ihrem beküm-  
mernis ziel vnd masse stellen / Jedoch habe ich nicht  
vnterlassen sollen / E. G. zu mehrerm troste vnd an-  
dern desto zu grösserm Exempel / glaubwürdig zu be-  
richten / welcher gestalt der Edle vnd Wolgeborne  
Graff Christian / seliger / E. G. geliebter Sohn /  
seinen abscheid von dieser Welt genommen / vnd  
mit wasserley andechtigen vnd Christlichen reden /  
Er seine Seele dem trewen Gotte in seine hende be-  
fohlen / des ihne auch neben mir andere fürneme  
Personen / gleichsfals zeugnis geben werden.

Ich wil aber alldo vnterlassen zu schreiben /  
was von mir Ampts halben mit E. G. geredt / vñ  
was für sprüche sindt gebraucht worden / Vnd  
nur allein fürzlich erzelen / was E. G. bis zu ih-  
rem abscheide geredt haben.

Deit

Den fünfften Augusti nach mittage/ bin ich  
zu S. G. erfordert worden/ dieselben in irer Franck-  
heit zu besuchen/ vnd zu trösten / darauff ich als  
bald hingangen/ vnd mich mit S. G. vermüge  
meines Amptes notturfftiglich vnterredet / Do  
dann S. G. zum beschlus begeret vnd gebeten/ des  
folgenden tages dieselben mit dem heiligen Hoch-  
würdigen Sacrament / des Leibs vñ Bluts Chris-  
ti zuuesehen. Auff den sechsten Augusti früe vmb  
vier Vhr bin ich wider erfordert worden / do dann  
S. G. sich mit vielen herlichen Sprüchen dem Al-  
mechtigen Gotte ganz vnd gar befolhen / vnd der  
Welt gar abgesaget haben/ Auch dorauß ihr be-  
kenntnis gethan / vnd das Nachtmahl des H. Erri  
Christi andechtig empfangen / Vnd sich forthin  
nichts mehr dann nur vmb ein seliges sterbstünd-  
lein bekümmert / vnd sehnlich begeret/ das man für  
S. G. ein gemeines Christlichs gebete in der Kir-  
chen / weil es eben am Sontag war/ thun wolte /  
Welchs auch also zum trewlichsten außgerichtet  
worden.

So bald ich aus der Kirchen kommen / hab  
ich S. G. wider besucht/ do dann die Franckheit  
jimmer zugenommen/ Vnd ob wol wir alle ons kei-  
nes tödlichen abscheids so bald versehen hetten / so

V iii hat

hat er doch wol drey mal vns allen vermanet mit  
ihme das liebe Vater vnser zubeten / das ime Gott  
nur ein seliges ende verleihen wolte / Dorauff hat  
S. G. immer feine Sprüche / zum teil Lateinisch /  
zum teil deudsch gesaget / balde feine Gebetlein ge-  
sprochen / vnd balde auch einen feinen gesang gesun-  
gen.

Von schönen sprüchen sagten S. G. sonder-  
lich diese / als Psalm 27. Vnd ob ich schon wandelte  
mitten im finstern thal / so fürchte ich doch kein vn-  
glück / dann du HERR bist bey mir.

Job 1. Der HERR hats geben / der HERR  
hats wider genommen / der name des HERRN  
sey gebenedeyet in ewigkeit.

Job 1. Nacket bin ich von meiner Mutter lei-  
be kommen / nacket mus ich wider dauon.

Rom. 8. Wen Gott mit vns ist / wer wil wider  
vns sein / Nie ist Christus der vns gerecht machet /  
Wer wil vns verdammen.

Vnter allen Sprüchen aber füreten S. G.  
sonderlich offte das herrliche bekentnis des lieben  
Jobs / Cap. 19. das sagten S. G. balde Lateinisch  
bald Deudsch mit grosser andacht : Ich weis das  
mein Erlöser lebt / vnd er wird mich wider auffers-  
wecken aus der Erden / vnd ich werde mit dieser  
meiner haut ombgeben werden / etc. Von

Von feinen Christlichen Gebetlein füretten  
S. G. dieses sonderlich: **HERR** Jesu Christ war  
Mensch vnd Gott/ der du lideft marter angst vñ  
spot/ etc. das ganze Gebetlein erzeleten S. G. et-  
lich mahl/ vnd sonderlich diese wort gar andechtig/  
Wenn mein mund nicht mehr kan sprechen / Vnd  
mir mein Hertz begint zubrechen/ etc.

Item/ gar offte sagten S. G. **HERR** Jesu  
Christ in die hende dein/ befehle ich dir die Seele  
mein/ Du trewer Gott du hast mich erlöset/ etc.

Aus der Vitanen erzeleten auch S. G. diese  
bitte Lateinisch / *A subitanea, improvisa & mala morte*,  
*libera me Domine.* Das ist/ Für einem bösen  
schnellen todt / behüte mich lieber **HERR** Gott.

Aus feinen Gesengen / gedachten S. G. des  
offte: Ich hab mein sach zu Gotte gestellt/ der wirds  
wol machen wie es ihm gefelt/ dem thu ich mich be-  
fehlen/ mein Leib/ mein Seel/ mein Ehr vñ gut / etc.

Es brauchten auch S. G. aus dem schönē  
Liede/ Kompt her zu mir spricht Gottes Sohn/ etc.  
dieses Verses: Ihr aber werdet nach dieser zeit/ mit  
Christo haben ewige freud/ dohin solt jr gedencke/  
Es lebt kein Man/ ders außsprechen kan/ die glori  
vnd den ewigen lohn/ den euch der **HERR** wirdt  
schencken.

Als

Als es aber nach mittage zwiffchen vier vnd  
fünff Vhr kam/ vnd S. G. aber mahl eine omacht  
fületen/ namen dieselben abermahl von irem Herrn  
Brudern Graffen Johan / gar einen feinen abs-  
scheid/ mit bitte / das derselbe S. G. Herrn Vas-  
tern/ vnd Frau Muttern freundlich gesegnen vnd  
bitten wolte/ dz sie sich vber seinem absterben nichts  
wolten bekümmern/ dann er wolte ohn allen zweif-  
uel ins ewige Himmereich wandern. Dorauff auch  
S. G. ihrem Herrn Brudern einen Valettrunck  
brachten / als dann fingen S. G. an zu singen mit  
lauter stimme/ Gott der Vater wohne vns bey/ vñ  
laß vns nicht verderben/ Mach vns aller Sünden  
fren/ vnd hilff vns selig sterben/2c. Alle drey Ge-  
setz haben S. G. mit vns frölich hinaus gesungen.  
Vnd on gefehr vber eine halbe stunde / fületen S.  
G. aber eine zuhangende omacht/ Do sagte Er/  
Wolan ikund wils ein mahl werden/ Ich befehle  
euch allen Gotte / vnd bedancke mich ewrer gehab-  
ten mühe/ Dorauff bewegten sich S. G. etwas im  
bette/ begünneten das gesichte zuuerkeren / Wir  
aber beteten / schreien ihme auch zu / do dann S.  
G. mit munde vnd Zeichen zuuerstehen gaben/ das  
sie auff ihrem vorigen bekantnis beharreten / Vnd  
als ein rechter Christianus dorauff sterben wolten/  
Wie

Wie auch mit einem einigen seuffzer sich sein  
leben endete/das ist also Gnedige Frau/ein kurzer  
vnd doch warhafftiger bericht/des seligē abscheids  
E. G. lieben Sohns / Welcher seinen Tauff namē  
ja herlich mit bekentnis vnd abscheid beweiset hat.

Derwegen werden E. G. dem gnedigen wil-  
len Gottes nicht widerstreben/ vnd ihrem Fleische  
vnd Blute die selige ruhe/bis zur endlichen Aufer-  
stehung des Leibs ginnen/ Do dann E. G. dersel-  
ben Sohn/ so wol als der Widwen zu Naim/ wi-  
derumb lebendig mit grosser ehre vnd herrligkeit/  
soll zugestellet werden.

Nach dem aber die Leiche von Sontags bis  
auff den Dinstag unbegrabē blieben/ habe ich mit-  
ler weile in der Schloßkirchen zum Exempel an-  
dern Hoffeleuten eine Predigt gethan / vnd diesen  
seligen Abscheid dorinne gerhümet / Welche Pre-  
digt E. G. ich auch zu gleich mit habe schicken wöl-  
len / Vnderthenig bittende/E. G. wollen diesen ein-  
feltigen trost vnd bericht / neben der kurzen Pre-  
digt / in gnaden annemen.

Gott der Vater alles trostes / wolle E. G.  
samt derselben geliebten Herrn/ vnd allen denen/  
G so

so dieser tödlicher abgang dieses Christlichen Gra-  
fens bekümmertlich ist / widerumb trösten / vnd  
die traurigkeit in freude verwandeln / vmb seines  
lieben Sons Ihesu Christi willen / Amen.

Datum zu Dresden / den 9.

Augusti / im 1570.

Jare.

E. G.

Vndertheniger

M. Philippus VVagner,  
Churfürstlicher Säch-  
sischer Hofeprediger.



Eine

**Eine kurtze Predigt:**

Zwischen dem Abscheid vñ der Begrebnis/  
des Edlen vnd Wolgeborenen Graffen  
CHRISTIAN, zu Oldenburgk vnd  
Delmenhorst/ r.

Geschehen in der Schloßkirchen zu Dresden  
den 8. Augusti / Anno 1570.

Aus dem Buch Job am 19. Cap.

**J** Ob sprach: Ach das meine rede ge-  
schrieben würden / Ach das sie in  
ein buch gestellet würden / mit einem ei-  
seren griffel auff bleye / vnd zu ewigem  
gedechtnis in einen Fels gehawen wür-  
den / Aber ich weis das mein Erlöser  
lebet / vnd er wirdt mich hernach aus  
der Erden auffwecken / Vnd werde dar-  
nach mit dieser meiner haut / vmbgeben  
werden / vnd werde in meinem fleische

**E ij Gott**

Gotte sehen / Denselben werde ich mir  
sehen / vnd meine augen werden ihn  
schawen / vnd kein frembder / etc.

**G**leich wie zweyerley Leute auff Erden seindt / derer etli-  
che dieser Welt gar ergeben seindt / Etliche aber die ein-  
herklichs verlangen nach den ewigen Himlischen gütern ha-  
ben / Also sehen wir auch zweyerley trost vnd hoffnung sol-  
cher Leute / Es befindet sich auch also zweyerley abschied  
an ihnen aus diesem leben / Dann die jenigen so ihre hoff-  
nung vnd zuversicht stellen auff dieses leben / vnd was in der  
Welt ist / die leben in tag hinein / vnd fragen weder nach  
Sünde / todt oder verdammnis / sondern wagens frey dahin /  
vnd ist ihnen keine Sünde zu schwer / vnd wenn sie an todt  
gedencken / wissen sie von keinem andern troste / dann es sey  
vmb eine böse stunde zu thun / Aber wenn angst vnd not  
kompt / so fallen sie in verzweuelunge / vñ ist kein trost noch  
hülffe bey ihnen / mit denen heist es darnach: Vitaq̃ cum  
gemitu fugit indignata sub umbras..

Die andern aber die bey zeiten sich nach Himlischen  
ewigen gütern sehnen / die haben einen solchen trost welcher  
vom Himmel herab kompt / durch den heiligen Geist / aus  
Gottes worte / das ist ein bestendiger trost / der do erquicket  
vnd erhelt / mitten im tode vnd allent andern unglück / sol-  
chen trost ergreiffet auch der liebe fromme Job in seinen euf-  
sersten vnd schweresten nöten / vnd begeret von herzen das  
solcher sein trost ihme zu einem zeugnis / vnd andern zur bes-  
serung

serunge mochte mit fleis auffgeschrieben vnd hinterlegt werden/ Wie dann Gotte dafür zu dancken ist / das solcher sein wunsch war worden/ vnd das auch viel frommer Christen in krafft dieses trostes durch den todt seliglich ins ewige leben gewandert seindt.

Wie heist dann solcher trost des  
lieben Jobs?

Er spricht:

**Ich weis das mein Erlöser lebt.**

Denen Wörten dencket fein nach. Das erste wörtlein/ Ich / beschreibet einen armen elenden durfftigen Menschen/ der mit allerley schmerzen vnd trübsal beladen war / vñ noch von seinen besten freunden / dozu verhönet wardt / vnd sahe gleich nichts anders dann den todt für augen. Der verzweifelt so nicht in seinen nöten vnd todesangst/ Sondern er rühmet etwas das er wisse / Ich weis/ Das wörtlein/ Ich weis / Ist ein glaubens wörtlein / vnd heist so viel/ als / Ich glaube/ Ich bin des gewis / vnd zweiuiele doran lauter nichts. Als wolte der liebe Job sein Creuz vnd seinen trost legen einander halten/ vnd sagen: Ob ich noch so krank / so verlassen / so arm vnd elend bin / so weis ich dennoch etwas das mich in deme allem tröstet. Wer wolte das nit auch gerne wissen / was es doch were/dz einen so herzlich tröstete? Das sagt Job:  
**Dis weis ich / Das mein Erlöset lebet /**  
Das wörtlein Goel heist ein Erlöser/ qui iure propinquitatis liberat, der einen erlöset/ dieweil er ihme verwandt ist.

E iij

Domit

Domit wirdt eigentlich verstanden/der HERR Ihesus Christus/ der vnser fleisch vnd blut an sich genommen / vnd vnser Bruder worden ist. Wie ihn auch das newe Testament nicht allein einē Erlöser/ sondern die Erlösung selbs nennet/ 1. Cor. I. Christus ist vns gemacht zur erlösung. 1. Timoth. 2. Der sich selbs zur erlösung gegeben hat für vns. Gal. 3. Christus hat vns erlöset/ 2c. Des Erlösers tröstet sich Job / der nicht aus zeitlicher not allein / sondern auch aus ewiger not errettet vnd erlöset / dauon der Erlöser Iesus heisset / dann er soll sein Volck selig machen von ihren Sünden/ Er ist allein der gute Hirt/ der Israel erlösen wirt/ aus seinen sünden allen.

Er tröstet sich auch des Erlösers / weil er nicht ein todter Heilandt vnd Erlöser ist / Sondern weil er lebet / vnd lebet im nicht alleine / Sondern allen die an in gleuben / wie er Ioan. 14. sagt: Viuo & vos viuetis, Ich lebe / vnd jr solt auch leben. Item/ Johan. 11. Ja sagt der Erlöser/ Wer an mich gleubt/ Ob er gleich stürbe / so wird er leben/ Vnd wer do lebt vnd gleubt an mich/ der sol nimmermehr sterben/ Ja dieser Erlöser lebt nicht allein/ Sondern er ist das leben auch selber/ durch welchen wir auch am jüngsten tage das ewige leben erlangen sollen. Wie er sagt: Ich bin die Auferstehung vnd das leben/ Ich bin der Weg/ die warheit vnd das leben.

Wie wenn aber dieser Erlöser andere angehörete/ vñ nicht dem lieben Job? Antwort. Darumb setzt er hinzu das wörtlein: Mein / **Mein erlöser lebt.** Das wörtlein Mein/ ist ein starckes glaubens wort / das den HERRN Christum

Christum auff eine jede sondere Person deutet / das sich die  
des Erlösers mag trösten. Was hülffe es Job/ wenn es Jac  
cobs / Abrahams vnd anderer Patriarchen Erlöser were ⁊  
vnd were nicht auch Jobs erlöser? Dorumb ist es so ein der  
bes Wörtlein / Mein Erlöser lebt / dorumb achte ich not vñ  
todt nichts. Des tröstet sich S. Paulus schier eben auff dies  
se weise/ Philip. I. Christus ist mein leben / vnd sterben ist  
mein gewin. Was Job nennet/ Er lebt/ Das nennet Pau  
lus / Er ist mein leben/ Was Job nennet einen Erlöser/ das  
nennet Paulus/ Christum/ vnd knüpffet S. Paulus fein zu/  
dieweil ich weis das dieser mein Erlöser lebt/ oder mein leben  
ist / so achte ich dis zeitliche sterben für meinen höchsten ges  
win. Was ist doch dis anders/ dann wenn wir heutiges tag  
ges sagen/ Ich glaub das Ihesus Christus mein Heilandt /  
vom tode auffstanden ist/ sitzt zur rechten seines Vaters /  
vnd verbittet mich/ lebet vnd regieret / r̄. Das were einem  
sterbenden Christen allein trosts gnug/ wenn er von herzen  
sagen künde: Ich weis das ich einen Erlöser habe / der do  
lebt vnd regieret / r̄.

Aber do höret was Job weiter sagt:

Derselbige Mein Erlöser wird mich  
hernacher aus der Erden aufferwecken.  
Item/ Ich werde mit dieser meiner haut  
vmbgeben werden. Item/ Ich werde in  
meinem fleische Gotte sehen / denselben  
werde

werde ich mir sehen / vnd meine augen  
werden in schawen vnd keinen andern.

Do habt jr einen schönen herrlichen grundt / vnd eine lebendige vnd liebliche Contrafactur des Artickels vnser heiligen Christlichen glaubens / von aufferstehung des fleisches. Den streichet der liebe Job herrlich aus schier durch alle gliedmas vnser leibes / wie alles an vns wider aufferstehen solle / dann do setzt er erstlich die ganze Person / Er wird mich aufferwecken / darnach gedencket er der durchlöscherten haut / die ihnd von geschwür schadhafftig war / vnd hernach von würmen solte verzeret werden / diese haut solle er auch wider bekommen.

Er gedencket auch seines fleisches / Ob es schon verwesen vnd vermodern werde / so werde es jm doch sein Erlöser in grosser klarheit wider zustellen / vnd ihn damit bekleiden. Er gedencket auch zu lest seiner augen / Ob die im tode breschen / vertunckeln werden / vnd nichts mehr sehen können / so werde jm sein Erlöser span neue augen geben / damit er sein Heiland wird können erkennen.

Heisset das nicht sein stückweis die aufferstehung vnser fleisches beschrieben ? eben wie das Gesichte Ezechielis auch sein ausweist / das immer eins nach dem andern an den verdorreten todten beinen sich wider findet / adern / fleisch / haut / athem vnd leben / vnd endlich ein ganzer mensch dor aus wird. Do haltet beides sein legen einander / was wir durch den tod der Sünden halben müssen erstlich werden / wie vns der tod zurichtet / vnd was wir von vnserm Erlöser widerumb haben zugewarten.

Der

Der todt / wie auch die Sünde / durch kreucht alles  
was am ganzen Menschen ist / vnd richtet manche schöne  
person also zu / das wenn man sie vber eine kleine zeit im gras  
be sehen solte / so würde man sehen / wie die haut von würmē  
durchfressen / das fleisch verzehret / die augen verweset / vnd  
also der ganze leib endlich gar zu nichte worden. Wie jenner  
seine Grabschrift machte:

Hie lige ich vnd muß verwesen /  
Denn ein Sünder bin ich gewesen.

Das macht vnser sünde / vnd weil der todt der Sün-  
den soldt ist / so müssen wir solcher besoldung auch an allen  
vnsern gliedmassen gewahr werden / ausgenommen die Seele  
die nicht sterben kan / dann sie ist nicht aus erden / Sondern  
diuinæ particula auræ, wie ein Poet sagt. D wie ein  
elendes bilde ist es nicht allein vmb den Job auff dem miste  
in der aschen / weil er noch lebte / Oder vmb einen Menschē /  
wenn er ihund erst verscheiden ist / Sondern viel elender ist  
es / wenn das vrtail Gottes an ihme erget / Du bist Erde /  
vnd solt zu Erden werden / dis elend dringet ohne zweiu-  
den HErrn Christum zum weinen vber Lazaro / also bedens-  
cket one zweiu- diesen jammer Menschlicher natur der Herr  
Christus / do er vber dem armen tauben vnd stummen mens-  
schen / so gen Himmel sihet vnd seuffzet / ehe dann er ihm seine  
Ohren öffnet / vnd das bandt seiner Zungen wider löset /  
Mar. 7. Vnd des erinnert vns die Schrift auch offte / weiß  
sie vns staub / aschen / gras vnd anders mehr nennet / 2c.

Dorauff müssen wir nicht alleine sehen / wenn wir ster-  
ben sollen / wie vns der tod zurichtet / sondern auch darauff /  
D wie

wie wir durch vnsern erlöser Ihesum Christum sollen wider  
zugerichtet werden an dem tage/ welchen S. Petrus Acto. 3.  
nennet diem restitutionis, do an vns alles wider sol zu rech-  
te gebracht werden/ Wir sollen aufferwecket vnd mit vnserer  
haut bedeckt / mit vnserm fleische bekleidet werden/ vnd also  
volkömlich / nicht wie ein gespenst / sollen wir mit vnsern  
augen vnsern Erlöser sehen/ ja nicht alleine sehen/ Sondern  
wir sollen seiner auch zur ewigen freude geniessen / wie inn  
vnserm Christlichen glauben balde folget auff die auffstes-  
hung des fleisches/ auch das ewige leben / dozu wir vnserer  
auffstehung geniessen sollen / wie jenner zu seiner Grab-  
schrifft auch setzte :

Ich hoffe aber ein ewiges leben /  
Welchs mir Christus der Herr wird geben.

Das nennet Job / den werde ich mir sehen / das ist :  
Zu meiner eignen lust vnd freude/ dann wann wir den Er-  
löser solten sehen/ wie ihn sehen werden die verdampften / do  
würde vns wenig damit behulffen sein / Aber do sollen wir in  
sehen/ Vns/ vns selbs zur lust vnd freude/ do sollen wir mit  
leiblichen augen sehen vnd erfahren / was wir ikund mit  
glaubens augen von Christo hoffen vnd gleuben.

Diesen schönen Spruch sollen wir vns stetts fürbilde  
den / als ein bilde des todes vnd des lebens/ des creukes vnd  
der herrlichkeit / so wir an vnsern leibern zu gleich sollen teil-  
hafftig werden/ Vnser leib der hie in diesem leben an allen  
gliedmassen des Creukes vnd trübsals mus gewarten / vnd  
endlich gar dem tode zu teil vnd vnterworffen werden/ Der-  
selbe leib sol auch in dem Herrn Ihesu Christo zugleich mit  
der

der seelen/ ewiger freude vnd herrligkeit genießen / Der leib  
der hie mit leidet / sol dorte auch mit herrlich sein / wie dann  
an Christo vnserm Erlöser/ sein leib / doran ganz vnd gar  
nichts gesundes war/ Esa. 53. Ja der dem tode ganz vnd  
gar vnterworffen war / widerumb zur herrligkeit ist erhoben  
worden. Was Gott vnserm leibe für schmerzen/ für ge-  
schwür/ für franckheit / auch für vngestalt zufüget/ im leben  
vnd im sterben/ auffm siechbette vnd im grabe/ das sollen wir  
achten für schöne Perlen vnd Edelgesteine/ damit Gott vn-  
sern leib zieret / wie jenner gelerte Man sagte/ Dann er sahe  
auff die zukünfftige herrligkeit/ wie Job inn seinen schweren  
vnd drüsen sihet auff das/ was nach dem tode folgen solle.

Zu solchem spruche mügen wir andere mehr nemen inn  
heiliger Schrift / vnd vnsern glauben damit stercken in al-  
lerley trübsaln/ als do Christus/ Johan. am 5. sagt: Alle  
die in Grebern seindt / werden die stimme des Sons Gottes  
hören vnd herfür gehen / 22. Nu sind jo nicht die Seelen /  
sondern die leiber in grebern/ dorumb werden jo vnser leib-  
er wider herfür gehen müssen.

Der alte Lehrer Ireneus beweiset die aufferstehung vn-  
sers fleisches daher/ das der Herr Christus den Blinden /  
Item/ denen so verdorrete hende / oder andere gebrechliche  
glieder gehabt/ nicht newe vnd andere augen/ hende vnd an-  
dere glieder geschaffen/ Sondern die vorigen zu rechte ge-  
bracht hat / hat nur das verderbte wesen dauon gethan / vnd  
den gliedmassen ihre krafft vnd vermügen gegeben. Also hat  
Christus eben des Obersten töchterlein / eben der Widwen  
Sohn/ eben den Lazarum wider aufferwecket / die zuvor ge-  
storben waren/ Damit hab der Herr Christus wollen anzei-

gen / das er vnser verfaulte todte corper wölle aufferwecken /  
vnd alle gliedmas doran rectificiren / was der sünden halben  
schadhafftig vnd gebrechlich gewesen.

Also können wir fein antworten auff die frage oder  
bekümmernis / wie dann S. Paulus sagt / Caro & sanguis  
regnū Dei non possidebunt. Do doch Job sagt / In meinē  
fleische werde ich Gott sehen. Dann S. Paulus redet nicht  
von der Substantz / oder wesen vnser Menschlichen leibes /  
Sondern von der verderbten art vnd natur / dann dasselbi-  
ge mus alles zuuor ausgefaget / vnd durch den todt abgelegt  
werden / vnd ein newer Mensch werden. Corporibus no-  
stris vitia detrahentur, spricht Augustinus, natura serua-  
bitur, &c. Es sol dorte die sünde auff hören / so sol auch der  
sünden solt auff hören / Vnd werden die auserwelten an leib  
vnd Seel volständig vnuerletzt vnd vnuersehret sein. Das  
sey fürzlich zur erklerung dieser wörte gesagt.

Wie komme ich aber zu diesem Text auff dis mahl  
möchte jemandt sagen?

Die vrsach darumb ich diese Worte hab fürzlich er-  
klaren wöllen / ist diese / Das Gott der Allmechtige nach  
seinem gnedigen willen / den Edlen vnd Wolgebornen Gra-  
ffen Christian / Graffen zu Oldenburgk vñ Delmenhorst /  
durch den zeitlichen todt abgefördert / Welcher Graffe mit  
diesem Spruche des lieben Jobs vnd andern sprüchen der  
heiligen schrift / so seliglich eingeschlaffen / das wir vnsern  
Hoffeleuten / solch exempel billich zu gemüte führen / dan wir  
ja alda nicht allein ein schön bilde eines Christlichen Hoffe-  
mans / sondern auch eines seligen Graffens gesehen / das zu  
wündschen

wündschen were/ es weren viel tausent solcher personen do  
gewesen / die ihnen an dieser Welt gütern/ freude vnd wol-  
lust / so viel gelegen sein lassen/ das sie nach dem ewigen le-  
ben nicht ein mahl mit ernst fragen/ Sondern es immer auff  
eine böse stunde sparen/ die manchem gar zu lang vnd ewig  
wehret. Aber dieser Wolgeborner Graffe / wie er mit  
dem namen Christianus hiesse/ also hat er seinen Tauffnas-  
men/ mit Christlichem bekentnis / vnd Christlichem abscheid  
beweiset / auch vns alle vmbstehenden gebeten / das wir ihm  
solchs seines bekentnis vnd abscheids für Gotte / vnd euch  
allen zeugnis geben wolten/ welchs wir auch billich thun/ als  
an welchem wir in warheit erfahren haben/ das der todt/ den  
gleubigen Christen ein sanffter schlaff sey/ vnd das denen die  
an Christum gleuben/ der todt nicht sawr wirdt / sie in auch  
nicht schmecken / noch gewar werden. So hat man also  
auch gesehen / was es ist/ wenn man bey gesundem leibe inn  
Gottes furcht gelebet/ sich zu Gottes worte gehalten / vnd  
einen grossen vorrath doraus gesamlet hat / von schönē sprü-  
chen/ Christlichen Gesengen vnd tröstlichen Gebeten/ Wie  
dieser Graff / seliger/ mit einem herrlichen vorrath gerüstet  
war. Mit den andern wird sichs ein mahl auch finden/ die  
weder Predigt noch Sacrament achten/ sich weder vmb ge-  
bete / noch Geistliche gesenge / vnd schöne Sprüche beküm-  
meren / Sondern warten ihres fressens vnd sauffens / ihres  
geizes vnd wollust/ Werden ein mahl sagen: Die angst  
ist nahe / vnd hie ist kein helffer / Denen wolten wir ger-  
ne dis Exempel/ vnd Jobs bekentnis fürhalten / weñ sie ver-  
handen weren / das sie lerneten auch sagen/ Ich weis einen  
Erlöser der lebt / vnd ist mein Erlöser / Aber doch werdens  
etliche vnter vns auch wol bedürffen.

D iij

Vmb

akt n 3988

Um des willen hab ich diese wort erklären wollen /  
wie E. L. des von andern beglaubten Leuten mehr zeugnis  
hören werden / vnd weil vns S. Paulus auch vermanet / das  
wir vber den verstorbenen vns mit den Worten von der fröli-  
chen aufferstehung vntereinander trösten sollen. Davon  
E. L. in ordentlicher Leichpredigt nach mittage one zweiuel  
weiter werden berichtet werden.

Gott vorleihe vns seine gnade das wir mit dem lieben  
Job / mit diesem Christiano / vnd andern gleubigen Chris-  
ten / vns für dem tode nicht so sehr fürchten / das wir dieses  
trostes von vnserer Aufferstehung darüber wolten vergessen /  
Sondern das wir mit namen vnd that als Christen  
leben / vnd entlich als Christen sterben.  
Das helffe vns die heilige  
Dreyfaltigkeit /

A M E N



M.C.

ULB Halle  
004 644 999

3



15







II n  
3988

vom Christlichen Ab-  
eid des Edlen vnd Wolgeborenen /  
rassen Christian / Graffen zu Olden-  
burgk vnd Delmenhorst / etc.

Kurzer bericht vnd trost / sampt einer  
Predigt / gestellet vnd gethan

Durch

PHILIPPVM WAGNER,

Schurfürstlichen Sächsischen  
Hoffeprediger / etc.



Dresden.

Gedruckt durch Gimmel Bergen.

Anno 1570.

